

# Powšitkowne WOZJEWJENJA

njedźelu, 4. nowembra 2018

## Nuncius přińdže do Budyšina

Japoštołski nuncius w Němskej, arcybiskop Nikola Eterović, přińdže do Łužicy. Wutoru, 13. nowembra, budže wón we 18 hodź. w Budyskej tachantskej cyrkwi Božu mšu swječić. Spěwać budže so z němsko-serbskeho kěrlušnika. Wšitcy su na kemše přeprošeni.

## TCM „Łužica pomha“ – Pomocna akcija za Pólsku a Ukrainu

Towarstwo Cyrila a Metoda z.t. (TCM) chce lětsa ze swojej akciju „Łužica pomha“ znowa dom za samostejace žony z dźěćimi w Etku w sewjerneje Pólskej podpěrać. Tam wjesela so nade wšěm, štož w swójbje trjebaš. Wotedać móža so pakćiki wot srjedy, 7. nowembra, do pjatka, 9. nowembra, wot 16 do 18 hodź., w Zejicach pola Špitankec, Kamjenska dróha 10. Podlěšenje pakćikoweje akcije je tohodla móžne, dokelž budže awto hakle sobotu, 10. nowembra, nakładowane..

Nimo toho chce TCM pólskeho duchowneho Paweła Staniaszeka, přećela fararja dr. Kruczyńskeho, w jeho skutkowanju za dźěći a młodžinu w ukrainskim měšće Perwomajsk z pjenježnym darom podpěrać. Pjenježne dary k wudžeržowanju sobotnišeje šule a trěbne ponowjenje jeje rumnosćow, za kotrež wustaji TCM darowanstu kwitowanu, móža so tohorunja pola Špitankec, dale w Budyskej redakciji Katolskeho Posoła, pola Moniki Kraloweje w Boranecach abo Rafaela Ledźborja w Ralbicach wotedać abo na konto towarstwa přepokazać: Cyrill-Methodius-Verein e.V., IBAN DE 65 750 90 300 000 828 23 66, hesło: „Ukraina“.

## Žarowanski kruh

Regina Krawcowa ze Smječkec a Tomaš Pěčka ze Sernjan poskićitaj přeni serbski žarowanski kruh. Wonaj staj kurs na žarowanskeho přewodźerja absolwowałoj. Štwórtek, 8. nowembra, w 17 hodź. chćetaj zhromadnje z dr. Ludmilu Lajderowej z Drježdžan přeni tajki serbski kruh wutworić. Předwidžane je, zo so tutón hač klětu do jutrow wosom króc w Chróšćanskeje putniskej hospodže zetka.

## Seminar k přirotej na mandźelstwo

Přizjewjenja za seminar k přirotej na sakrament mandźelstwa wot pjatka do soboty, 30. nowembra do 1. decembra, w Smochćicach přijimuju pisomnje hač do srjedy, 7. nowembra, w Dekanatnym dušepastyrstweje we Worklecach. Formularj k tomu su w cyrkwjach wupožene.

## Njebjelčanska kermuška

Přeprašujemy wšitkich na kermušku. Přińdźće tuž pjatk, 9. nazymnika, do Njebjelčic. Započatk je w 19 hodź. z młodžinskej Božej mšu we wosadneje cyrkwi. Přizamknu so reje z kapału Logarithmus w „Bjesadze“. Zastup plaći štyri eura.

*Njebjelčanska wosadna młodžina*

## **Eksercicije za Serbow – Boži Duch wožiwja**

Kotry duch nas wjedže? Mje wosobinsce, moju swójbu, w powołanju, w towaršnosći, w tutym času? Wo tutech prašenjach budu na eksercicijach za Serbow wot pjatka, 9. nowembra, wječora hač do njedžele, 11. nowembra, připołdnja rozmyslować. Dny rozpominanja chcedža pomhać rozeznawać mjez žiwjenja spomóžnym a žiwjenja strašnym duchom, mjez dobrymi časowymi prudami a tymi, kotrež žiwjenje niča. Přizjewjenja přijimuju pak direktnje w Exerzitienhaus HohenEichen, Dresdner Str. 73, 01326 Dresden, info@haus-hoheneichen.de, telefonowe čisło (03 51) 2 61 64 10 abo w Chrósćicach na farje, telefonowe čisło (03 57 96) 8 04 00.

## **Poswjećenje wopomnjenskeho kamjenja**

Při pomniku swjateju Cyrila a Metoda njedaloko Smochćic ma so sobotu, 10. nowembra, w 14 hodź. wopomnjenski kamjeń ze štyrjomi taflemi poswječić. W serbskej, němskej, jendźelskej a hebrejskej řeči wopisuje so na nich podawk, kak su nacionalsocialisća kolonu židowskich žonow ze Słoneje Boršće na Smochćicy do Miłkec čěrili. Jedna z nich je w tym zwisku žiwjenje přisadžiła. Poswjećenskemu nyšporej přizamknje so swačina w Domje biskopa Bena w Smochćicach.

## **Prěnjowoprawjenske džěci přeprašene**

Dekanatne dušepastyrstwo přeprašuje wšitke džěci, kotrež so na přenje swjate woprawjenje přihotuju, na zhromadny džen pod hesłom „Cool kadla – fecich holca“ srjedu, 21. nowembra, wot 9 do 15 hodź. do Njebjelčic. Započatk je z Božej mšu w cyrkwi. Zajimcy njech so prošu hač do pónđzele, 12. nowembra, pod telefonowym čisłom (03 57 96) 8 87 07 abo z mailku worklecy-kise@gmx.de we Worklecach přizjewja. Za wudawki dnja zběra so wot kóždého wobdžělnika přinošk we wysokosći štyrjoch eurow.

## **Praski chór spěwa w Róžeńće a Ralbicach**

Cyrkwinski chór Cantus amici z Prahi wuhotuje sobotu, 17. nowembra, we 18.30 hodź. koncert w Róžeńčanskej swjatnicy. Mjez druhim zaklinčitej Antona Brucknerowe „Locus iste“ a „Ave Maria“. Wuměłski nawod změje Lukáš Dobrodinský, na piščelach zahraje Ondřej Valenta. Nazajtra njedželu, 18. nowembra, wobrubu Praski chór Božu mšu we 8.30 hodź. w Ralbicach.

## **1989! – A džensa?**

Pozadki politiskeho přewróta lěta 1989 w NDR a zwiski k druhim europskim krajam předstaji něhdyši korespondent telewizijneho sčelaka ZDF Joachim Jauer pjatk, 23. nowembra, po wječornych kemšach w Ralbicach na „Radlubinje“, potajkim wot něhdže 19.45 hodź. Po přednošku je składnosć, so z nim wo aktualnych prašenjach rozmołwjeć. Na wječor přeprašuje sekcija Wěda a skutk Towarstwa Cyrila a Metoda z.t.